

A la tschertga da mes credo

da Maria Cadruvi

Pli baud hai jau recità bleras giadas il credo. Ed jau patratg anc oz gugent vida quest sentiment da dumengias dal temp da mi'uffanza: Cura ch'il priedi era finalmain a la fin intunava il plevon a moda festiva: „Credo in unum Deum ... „ ed il pievel ubain il chor viril respundeva: „Patrem omnipotentem ...“.

Pli tard, cura ch'il credo è vegnì rumantsch, hai jau cumenzà a tadlar tge che vegnia uschiglio anc recità en questa cardientscha: „ ... ina sontga catolica Baselgia, cuminonza dils Sogns, remischun dils puccaus, levada della carn e la veta perpetna. Amen.“ Bleras giadas hai jau recità era quai. Anc pli tard, cura ch'jau hai cumenzà a viagià per il mund enturn, hai vesì ils tempels dad Angkor Wat, la moschea gronda dad Isfahan e las ruinas dal Monte Alban, hai jau chalà da recitar quai dad „ina sontga catolica baselgia“. Sche jau gieva a messa, scha tar quella passascha da la cardientscha serrav'jau simplamain la bucca. Ed insacura hai jau constatà che *mes credo* e quel da la baselgia catolica eran fitg fitg differents in da l'auter. Ma la dumonda dal credo è restada. Betg perquai che questa dumonda ma turmentass, mabain perquai ch'ella ma para ordvart interessanta.

Mintgatant hai jau gust da formular en mes patratgs mes agen credo. Per ordinari sa sviluppescha questa intenziun ad ina sort ping pong intern, spir battibugls. Qua sa cruschen dumondas sco: Stoss jau in summa crair? Vi jau crair? Vi jau crair sulettamain quai che fa tenor mai in senn, ubain vi jau crair era quai ch'jau na sai e na chapesch in summa betg? Èsi bun per il carstgaun sch'el crai, ubain èsi meglier sch'el na crai betg? En tge sa differenziescha la vita dad ina persuna che sa numna cartenta da la vita dad ina persuna che sa numna nuncartenta? È la cardientscha in summa ina decisiun, ubain è ella plitost ina disa u forse in regal? A tgi porta la decisiun da crair il pli bler? A mai mezza, a mes concarstgauns, a la vita, ad in dieu? Crai jau in summa en in dieu? E sche gea, pertge betg en plirs dieus? Han las dunnas in'otra cardientscha ch'ils umens? Ed è la cardientscha vairamain parentada cun la fidanza, l'engraziavladad e la ventira?

Sco quai ch'i dat in di internaziunal dal nutriment ed ina massa auters dis internaziunals davent dal di da la mamma terra enfin al di da l'alfabetisaziun uschia savessi dar a l'entschatta dad in onn nov era il di dal credo. Mintga persuna tschertgass la formulaziun per ses credo actual. „Jau crai en la vita cun tut sias manifestaziuns, era en quellas misteriusas inclusiv la mort. Jau crai en la sabientscha da la vita. Jau crai ch'jau saja bainvegnida e bainvulida da la vita, envidada dad explorar ella, da dar furma ad ella e quattras daventar creadra, suletta ed ensemen cun auters.“

Tgunsch pussaivel ch'jau formulass en in onn tut auter mes credo. Crair n'è betg insatge fix, mabain in process. Ed jau crai ch'i saja captivant, irritant e fitg vivifitgant dad empruvar adina puspè da nov da formular: Tge crai jau vairamain?

maria.cadruvi@spin.ch

Ord:

La Quotidiana, 04-01-2011, p. 12.